

Ambtenaarnan rabia y academiconan ta cuestiona nombramento na DIP

Critica pisa riba partidonan politico

ORANJESTAD (AAN) Dianan di fiesta y dianan liber a pasa y awor cu gobierno no tin nada mas pa kita atencion di pueblo, rosea di pueblo hopi disgusta cu mal maneho y specialmente e maneho unda amigonan ta haya tur sorto di privilegio, lo bay bira dia pa dia mas cayente den nek di gobernantenan.

Un di e gruponan hopi disgusta cu mal maneho y maneho di privilegia aliadonan ta e grupo di ambtenaarnan pasobra keto bay ministranan ta sigui nombra hendenan cu no ta capacita riba puestonan clave y importante.

Nombramento di un director nobo pa DIP cual ta e departamento nobo bao cual Domein Beheer, VROM y DOW ta cay, a crea un disgusto y rabia basta grandi den seno di ambtenaarnan.

Siman pasa na Curacao un ministro a haya su mes mal pega cu nombramento di un persona controversial riba un puesto halto y consecuencia di e nombramento cuestionable ey tabata cu e ministro mester a tene honor na su mes y tuma su retiro.

E informacion ey a yega Aruba tambe y aki ambtenaarnan cu preparacion di HBO, Academico y Universitario tin cu sinta wak y peor ainda, soporta cu ministranan ta nombra kende cu nan ta haya ta bon riba puestonan clave y a lo largo e nombramentonan aki ta bay afecta pais Aruba y

sigur e relacion di trabao y maneho na e departamentonan concerni.

Un di e nombramentonan mas controversial y cuestionable bao di e gobernacion actual tabata esun recien pa director di DIP unda un persona cu no a caba ningun preparacion di estudio universitario of academico significante, a logra, via politica di privilegio di amigonan di ministranan, haya un puesto pa cual te awe ni consejo di ministranan y menos ministro Marisol Tromp por demostra na pueblo cu e persona tin tur preparacion y habilidad pa ocupa e puesto di director di DIP.

Un CV esta un lista di preparacion di estudio y experiencia di trabao relaciona cu e director nobo pa DIP a ser manda pa tur medio di comunicacion pa asina trata na crea e impresion cerca ambtenaarnan y tambe cerca pueblo cu e director nobo pa DIP ta un persona cu masha

hopi capacidad den linea di trabao y cu masha hopi experiencia.

E CV a worde publica den DIARIO y tur hende cu a wak y a lesa e CV tabata puntra nan mes si ministro Marisol Tromp por tabata tin cuero di cara di bay den publicidad pa defende e nombramento di Sjak Shie como director di DIP?

Te awe ta hopi dificil y casi imposibel pa pueblo en general kere cu di e supuesto lista largo di candidatonan cu a solicita pa e puesto di director di DIP, ta Sjak Shie so a sali como esun mas capacita y si mester analisa e CV di Sjak Shie, un mucha di school secundario mes lo bisa cualkier ministro cu nan no mester trata na tira santo den wowo di hende cu un presentacion asina controversial.

Ambtenaarnan cu preparacion academico y universitario y te hasta esnan cu MBO, a duna di conoce cu pa tur hende ta bon bisto cu e otro ministranan den

consejo di ministranan a bay di acuerdo cu ministro Marisol Tromp pa nombra Sjak Shie como director di DIP sabiendo cu e persona no tin e preparacion profesional pa e puesto, pasobra cada ministro tin nan mesun hendenan para den rij pa nan tambe worde nombra riba puestonan pa cual nan tambe no tin ningun preparacion cu por worde hustifica.

Eleccion ta na caminda y ambtenaarnan cu awor masalmente ta cuestiona mal maneho di gobierno, ta puntra nan mes ta ki posicion otro partidonan na Aruba ta bay tuma relaciona cu nombramento cuestionable na DIP y tambe otro nombramentonan cu ya a worde haci y tres nombramento mas cu tin na caminda, esta director pa Tele Aruba, APA y director pa DTI.

Ambtenaarnan ta haya cu e falta di reaccion debido di otro partidonan politico ta ilustra cu politica di antaño keto bay ta bibo den e


democracia infantil y pover cu ta reina riba Aruba y cu muy probablemente otro partidonan ta keda keto riba nombramentonan

cuestionable pasobra ora nan haya oportunidad pa drenta gobernacion, nan tambe tin nan mesun hendenan cu no ta apto pa cierto puestonan, wardando pa worde nombra.

Escogencia di votadornan den seno gubernamental y tambe esnan cu preparacion di MBO, Academico y universitario den sector priva lo bay depende hopi di e posicion cu partidonan politico lo bay tuma durante dianan venidero relaciona cu nombramentonan cuestionable den e aparato gubernamental.

**TELEFONAN
DI DIARIO
582-6747
FAX
582-8551**

NEW YORK CRIOLLO!!



BEST DEAL


Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



2 Pc.
set di
cama di baby
Afl. 225,=